

Item/ die mortification, der Karaben, Resinen, Terpentinen/ vnd Gummen ist/ das sie in ein Oleum oder Firniß gebracht werden.

## Von dem Myrrhen.

Myrrha ist ein Gummi eines Baumes/ so nicht alleine in Egypten/ sondern auch in Mohrenland / Chaldeen/ Armenien/ vnd andern örthen mehr wechset / vnd wiewol die Gelährten vnterschiedliche Geschlechter davon beschrieben / so wollen wir doch allhie fürnemlich von der rothen Myrrhen reden / die soll sein an der farb schön roth/ gar sauber vnd lauter/ fettlicht/ leicht am gewicht / auch sonst gestalt wie ein rechtes Gummi / vnd das sich leichtlich zerbröckelen lasse / am geschmack bitter vnd hannich / vnd wie ein Gewürz durchdringend/ vnd wan man ihn auff eine Gluet wirfft/ das er einen starcken lieblichen Würzgeruch von sich gebe / also / das er wegen seiner starcke fast schlaffen mache. Die Gelährten eins theils vrtheilen ihn für warm vnd trucken im andern grad, ihr eßliche aber sagen / das es im dritten grad sey: Er reiniget gar gelind / ohne einige scherffe/ vnd zeuchet darneben zusammen / vnd lesset in des Menschen Leibe keine putrefaction, verrotzung/ noch feulung einfallen/ vnd wird auch derenthalben zu Balsamirung abgestorbener Menschlicher Leichnammen gebraucht: sonst ist er auch nützlich / zu heilung der Augengeschweer / vnd ein klar gut Gesichte zu machen: auch Ohrengeschweer reiniget vnd zur heilung befördert er: Den jenigen/ so ein feucht flüssiges Haupt haben / machet er schlaffen / vnd dargegen / die hitziger Natur/ trucknet zu sehr / vnd macht ihnen das Haupt gar zu hitzig. Wer einen stinckenden Athem hat / der kawe offemahls in seinem Mund Myrrhen/ so dilget er die feulnuß/ davon dieser gestanck entstehet/ auß/ vnd macht also wiederumb ein wolriechenden Athem: Den Strauch oder Schnuppen zuvertreiben / soll man Myrrhen vnter die Zungen nehmen/ vnd also zergehen lassen / vnd einschlucken / vnd wann Myrrhen zum öfftern im Munde gefawet wird / so stercket er die wacklende Zähne / vnd heilet das böse faule Zahnfleisch. In der Kranckheit / die Breune genant / ist er gar erspießlich anzuwenden/ lindert die Heischere / reiniget die Gorgel oder Keel von aller kalten groben scharffen feuchte / davon sie rauhe vnd schadhafft worden ist / machet auch eine reine gute helle Stimme / ist dienlich wider

der